

PAS Boleh Maafkan Umno - Takiyuddin
MStar Online
20 Disember 2015
Oleh: RAHIMY RAHIM

KUALA LUMPUR: PAS sedia bekerjasama dengan Umno kerana memaafkan merupakan sebahagian daripada perjuangan politik parti itu, kata setiausaha agungnya, Datuk Takiyuddin Hassan.

"Ia merupakan antara ciri-ciri perjuangan kita dan ia bukan sesuatu yang baharu apabila sesetengah pemimpin menyertai PAS dan masih boleh diterima oleh ahli-ahli kita," kata Takiyuddin ketika ditanya sekiranya parti itu sedia memaafkan Umno, semasa mesyuarat agung tahunan Perkasa pada Ahad.

Beliau berkata, PAS terbuka kepada sebarang kerjasama politik dengan mana-mana kumpulan demi perpaduan ummah.

"PAS berjuang berdasarkan prinsip ini. Jika ada parti lain yang menerima pakai prinsip-prinsip yang digunakan PAS, kita terbuka untuk bekerjasama berdasarkan agenda lebih besar. Ia tidak kira sama ada parti itu Islam atau bukan Islam," katanya.

Takiyuddin yang juga Ahli Parlimen Kota Baru menyatakan bahawa kepimpinan parti sedang memberikan penjelasan kepada para penyokong mengenai hasrat untuk bekerjasama dengan Umno.

"Secara dasarnya, sebarang keputusan yang dibuat oleh presiden adalah secara kolektif. Ia merupakan keputusan kolektif di bawah parti," katanya.

Pada Khamis lalu, Presiden Umno, Datuk Seri Najib Tun Razak dan Presiden PAS, Datuk Seri Abdul Hadi Awang menghadiri majlis Multaqa Serantau Alumni Al-Azhar Malaysia.

Majlis itu meluluskan tujuh resolusi di mana antaranya termasuk menyeru kerjasama politik antara PAS dan Umno demi perpaduan umat Islam yang lebih baik dan harmoni.

Tags / Kata Kunci:
Takiyuddin Hassan

Hakcipta Terpelihara © 2015 Star Media Group Berhad (ROC 10894D)

Source: <http://www.mstar.com.my/berita/berita-semasa/2015/12/20/pas-boleh-maafkan-umno/>